

2019-imut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Naalakkersuisoq)

Akissuteqaat

(Aningaasaqarnermut Naalakkersuisoq)

Aappassaaneerinnineq

Nunatta Karsiata 2019-imut naatsorsuutai pillugit Kukkuersiuinermut Ataatsimiititaliap isumaliutissiissutaa Naalakkersuisut sinnerlugit qujassutigaa. Ataatsimiititaliap naatsorsuutit eqqortuusut isumaqatigiipput aamma akuerineqarnissaat inassutigalugu, tamanna Naalakkersuisut naammagisimaarlugu oqaatigaat.

Kukkuersiuinermut Ataatsimiititaliap piffissaq sivisunerusumi, nalinginnaasumik piffissaq qinigaaffiusoq tamarmi, atuutsilerlugu Inatsisartut suleriaasiata allanngortinneqarnissaa Kukkuersiuinermut Ataatsimiititaliamit kissaatigineqartoq isumaliutissiissutip aallarniutitut immikkoortuani allassimavoq. Tamanna pillugu oqaloqatigiinneq ataatsimiititaliap Inatsisartullu siulittaasoqarfiata akornanni 2019-imili ingerlanneqarsimasoq allassimavoq. Apeqquut tamanna pingaartumik Inatsisartut namminneq isumaliutigigaat Naalakkersuisut isumaqarput, taamaattorli tamanna kissaatigineqassappat siunnersuutip piukkunnarsarneqaaqqinnissaa siunertaralugu Naalakkersuisut saaffigineqarnissaminnut soorunami piareersimalluinnarlutik.

Namminersorlutik Oqartussat naatsorsuuseriffiat, tassungalu ilanngullugu missingersuutit ukiut kingulliit assigalugit ingerlaavartumik malinnaaffigalugit suliat suli pitsanngoriartornerat pillugu paasisutissanik Kukkuersiuinermut Ataatsimiititaliap kukkuersuisut avataaneersunit pissarsisimammat Naalakkersuisut nuannaarutigaa.

Kukkuersuisut oqaaseqaataat ataaseq ukiut siuliineersoq 2019-imi matuneqarpoq, taamaattorli nutaamik oqaaseqaatitalernejarluni, kukkuersuisullu oqaaseqaataat ammasut suli arfineq marluullutik. Aammattaq kukkuersuisut oqaaseqaataat suli ammasut allat pitsanngoriaateqarput.

Suleriaatsit suliffiullu iluani nakkutilliissutit Namminersorlutik Oqartussat aningaasaliissutinik naatsorsuuserinermilu maleruaqqusanik malinnissinnaanissaannut ikorfartuutaasut nukittorsarneqarnissaat suli aallunneqartariaqartoq Kukkuersiuinermut Ataatsimiititaliamit oqaatigineqarpoq. Tassunga atatillugu pisortat aningaasaqarnikkut ataatsimoortumik periusiat nutaaq Prisme Namminersorlutik Oqartussat allaffeqarfiata ilaani 2019-imi kvartalit sisamaanni atuutsinneqalersimammat ataatsimiititaliamit maluginiaqquneqarpoq. Periuseq Akileraartarnermut Aqutsisoqarfimmi kommuninilu arlalinni atuutsinneqariartuaarpoq. Nunatta Karsiata

kukkunersiuisuata kukkunersiukkat pillugit oqaaseqaataasa arlallit aaqqinneqarnissaannut periuseq tapeeqataaassaaq. Periutsip nutaap pitsanngorsaannissaa Naalakkersuisut ataatsimiititaliaq assigalugu pingaartippaat, tamatumali peqatigisaanik aamma erseqqissaatigissallugu aningaasaqarnikkut periutsimik nutaarluinnarmik kontunullu pilersaarummik nutaamik atuutsitsilernermi sulisorpassuit suleriaasii periusiilu annertuumik allannguuteqartinneqassammata, taamaattumillu periutsip nutaap inernerisassai aalajangersimasut takuneqarsinnaalernissaasa naammagittarluni utaaqqineqarnissaat pingaaruteqarpoq.

Kukkunersiuinermut Ataatsimiititaliaq isumaliutissiissummi aamma arlalinnik kaammattuuteqarlunilu innersuussuteqarpoq. Naalakkersuisut akissuteqaammi uani innersuussutit tamaasa oqaaseqarfigisinnaanngilaat, taamaattorli ataasiakkaat iserfigerusullugit.

Naatsorsuutitut nassuiaatit eqqarsaatigalugit Nunatta Karsiata Naatsorsuutaasa sukannersumik suli malinnaaffigineqarnissaat pitsaasumillu nalunaarusiorneqartarnissaat suli kissaatigineqartoq Kukkunersiuinermut Ataatsimiititaliamit oqaatigineqarpoq. Aammattaaq sunniutinik uuttuinissap aallunneqarnerunissaa ataatsimiititaliamit kissaatigineqarpoq. Suliassa qarfiup tamatuma siuarsarneqarnissaa suli pisariaqartinneqartoq aamma ataatsimiititaliamit siunnersuutigineqartutut maleruaqqusat ersarissarneqarnissaat Naalakkersuisunit isumaqatigineqarpoq.

Atuinerup piffissap ilaatigut annertuumik nikingassuteqarneranut atorfiit inuttaqanngitsut pissutaasut Kukkunersiuinermut Ataatsimiititaliap oqaatigaa. Atorfiit inuttaqanngitsunut pissutaasut pisariullutillu assigiinngitsorpasussinnaasut Kukkunersiuinermut Ataatsimiititaliaq isumaqarpoq. Kukkunersiuinermut Ataatsimiititaliamit kaammattuutigaat suliassat pingaarnert ingerlanneqarnissaat eqqarsaatigalugu atorfiit inuttaqanngitsut taakkulu kingunerisaat pillugit suliassa qarfiit akimornerullugit takussutissiornissaat Naalakkersuisunit isumaliutigineqassasoq. Aammattaaq suliassat pingaarnert ingerlanneqarnissaannut sunniutaasinnaasut pillugit naliliissut pisuni atorfiit inuttaqanngitsut atuinermi nikingassutaasunut pissutaatillugit tamanna naatsorsuutit pillugit nassuiaatini oqaatigineqartariaqarpoq. Kukkunersiuinermut Ataatsimiititaliamit innersuussut aamma siunissami suliainni ilaatinniarlugu Naalakkersuisunit oqaatigineqarpoq.

Akissarsiatigut atorfinitsitsisarnikkullu atugassarititaasut malillugit atugassiinerni annertuumik kukkussuteqartoqarsimanngitsoq ataatsimiititaliamit oqaatigineqarpoq. Taamaattorli atorfinitsitsinerit ilaannut atatillugu atorfinitsitsinermit isumaqatigiissut ataaseq utertinneqarsimanngilaq. Taamaattumik tamatuma malitseqartinneqarnissaa Kukkunersiuinermut Ataatsimiititaliamit sakkortuumik innersuussutigineqarpoq. Suliassa qarfiup tamatuma pitsanngorsarneqarnissaanik ataatsimiititaliap isumaqarnera Naalakkersuisunit isumaqatigineqarpoq.

Namminersorlutik Oqartussani siunnersortit avataaneersunik atuineq pillugu siunissami nalunaarsukkamik nassuiaatitalimmik saqqummiussisoqarsinnaanissaa siunertaralugu tamatuma

Nunatta Karsiata Naatsorsuutaanut atatillugu aalajangersimasumik nalunaarutigineqartarnissaanut suliniutit pisariaqartunik Naalakkersuisut aallartitsinissaat ataatsimiititaliamit innersuussutigineqarpoq. Suliassa qarfirmi tamatumani ataatsimut nalunaarsukkanik naatsorsuutit ilaqartinneqannginnerat ataatsimiititaliamit isornartoqartinneqarpoq. Suliassa qarfik tamanna maanna annertuumik soqutigineqarpoq, taamaattumillu Namminersorlutik Oqartussat siunnersortit avataaneersunik atuinerat pillugu quppernerit 60-it sinnerlugit nalunaarusiornermikkut suliassa qarfiup paasisa qarfiginissaanut Naalakkersuisut siusinnerusukkut suliniuteqareerput. Nalunaarusiaq taanna isumaliutissiissummut ilanngussatut ilanngunneqarpoq. Ilaatigut paasissutissat ataatsimiititaliamit ujaroneqartut nalunaarusiami allassimapput. Nalunaarusiami suliassa qarfiup pitsaanerusumik aqunneqarnissaa siunertaralugu kaammattuutit arlalinnik saqqummiussisoqarpoq. Tassungalit atatillugu aamma oqaatigissallugu pingaaruteqarpoq siunnersortit avataaneersunik atuneq annikillisinneqarnissaat kissaatigineqarpat, suliassat sularineqarnissaannut suliffiup iluani sulisut atoroneqartartut amerlisinneqarnissaat pisariaqartoq. Piffissami sulisunik immikkut ilisimasalinnik atuisinnaaneq killeqartillugu ilungersunarpoq.

Pisortat pisiortornerannik aqutsineq nukittorsarneqassasoq ataatsimiititaliap kaammattuutigaa, taamaalilluni pisiortornermi isumaqatigiissutit neqerooruteqartarnermilu suleriaatsit ataatsimut isigalugu nukittorsarneqaqqullugit. Ataatsimiititaliamit kaammattuut Naalakkersuisut isumaqatigaat, tassungalu atatillugu qitiusumik allaffeqarfirmi taassumalu immikkoortortaani nioqqutissanik sullississutinillu pisiortoroneq pillugu kaajallaasitaq nutaaq ulloq 20. oktober 2020-mi atuutsinneqalernera ilisimatitsissutigalugu. Periutsit aqqissuussat, suliassa qarfiit akimorlugit suleqatigiit kiisalu suliffiup iluani akisussaaffinnik agguataarineq ersarissaq naapertuuttorlu aqqutigalugit Namminersorlutik Oqartussat pisiortornerannik pitsanngorsaanerup siuarsarneqarnissaa kaajallaasitami siunertarineqarpoq. Pisiortornermut suliassa qarfiup iluani periarfissat atorluarneqanngitsut piviusunngortinneqarnissaannut taamaalillunilu siunissami sipaaruteqarnissamik nassataqarnissaanut kaajallaasitaq nutaaq peqataaqataassasoq naatsorsuutigineqarpoq.

Kiisalu Nunatta Karsiata 2021-mut naatsorsuutaasa kukkunersiuinermik aktiaatileqatigiiffik Deloittemit kukkunersiorneqarnissaat ataatsimiititaliamit inassutigineqarpoq. Tamanna Naalakkersuisunit isumaqatigineqarpoq.

Naggasiullugu Kukkunersiuinermut Ataatsimiititaliap isumaliutissiissut annertuumik suliaqarneranut qujaffigaara.

Taama oqaaseqarlunga siunnersuut Inatsisartunit inaarutaasumik aappassaaniigassanngortippara.